

四庫全書

子部

欽定四庫全書

子部
星學大成卷十七

詳校官監察御史_臣邱庭澍

靈臺郎_臣倪廷梅覆勘

總校官進士_臣朱鈐

校對官中書_臣潘庭筠

謄錄監生_臣薛振基

欽定四庫全書

星學大成卷十七

明 萬民英 撰

三辰通載 五星

水德辰星

總龜算法置積日加八十一以一百十五日八十七
分六十一秒為伏見留退一終之數除之不滿者為
餘日一下中定星以餘日數去之看有何段又看入

段得幾日十七度便是水星定度

夕伏十八日行三十四度五十分去日十六度五十

分而夕見於西方

順行十七日順遲十日共行三十一度五十分

夕留二日不行夕退十日九十二分八十秒半行八

度六分十九秒半晨退十日九十三分八十秒

半晨留二日晨遲十日順行十七日

晨伏十八日行度並與上同

水星論

水星辰星之精也一名滴星一名龜星建北方之氣其色黑其性智廷尉之象出沒依期光明澤潤歲豐民泰伏見不時災傷獄訟不平其行宮度亦有伏順留逆附日而行不離前後一宮一年一周天入留段號台星主發薦不能登科入逆段號厄折星主多災難又伏段號天井星主口舌是非

庚生人以為祿主星甲生人以為刑星

乙生人以為貴星 丙生人以為陰星

丁生人以為耗星 戊生人以為福星

己生人以為暗星 辛生人以為權星

壬生人以為囚星 癸生人以為印星

此星廟午旺巳喜辰好亥子

琅玕經云水居雙女最為靈華省臺官給諫臣巨蟹

柳星超職位股肱帝力彩絲綸或臨亥子多招祿方

主推之福轉純身命限中俱見照財多恩博更相親

○此星入命專主性巧文章冠世筆陣超羣○經云
北方水星專主智性地惺惺多巧藝好樂陰陽巨蟹
宮若臨申巳尤為貴生逢坐命最聰明更在身宮亦
伶俐非惟辨舌若懸鈴更主文章多藻麗○水入命
者無大驚恐災厄逢厄不危臨險不險大事成小能
順人情合煞星則反吉成凶見善宿則變禍為福
水星入命最為神危厄災逆事不成逢惡則凶善則
吉方知此曜順人情惟有水星本無定相近之處即

為性附陽與陽為福星附陰與陰為善慶與日合兮
主文章性巧聰明難比並世上文才須見水善星成
福最為佳忽然更有吉星照人間喜美事奢華○賦
云給諫功臣須假水臨雙女最怕與計羅字同位則
主刑害天折忌疾壓身若六壬人見之為囚不得其
用更在戌位則為怒地主早年作事淹滯坐命在寅
亥者以此為科甲安身在巳申者以此為學堂宜在
高強旺樂喜好之宮更有吉星臨照或居三合四正

大有福力若為官星為祿主庚人以此為天官正祿
俱不可陷弱○經云官星元在第十宮此星宜順旺
廟中若能躔在強處必為將相祿權隆○天元祿
主星更高身命四正福堅牢此星陷弱多吉曜雖然
有剝免煎熬○坐命在卯子者以此星為天廚祿主
若人命則為坐天廚格更有金木同宮即便以富貴
兩全斷之六壬生人見之四十以前未見食祿晚年
大享福

水星歌

辰星快利有文章形相清嚴色潤光智慧聰明多巧

妙出人學問不尋常情不定性溫良遇員則員方則

方樂廟若居己中貴他宮筆吏好心腸

水在命宮樂廟高曰及第

他宮有文才筆吏也

日會父筵多酒食月逢二母莫思量木月

見吉仍昌李杜文章萬丈長

日月會主文章

晝火若同貧且

賤刑尅尤防上法場夜土會主癰傷金妻愛入別人

房

與夜土會主癰難與金合主妻淫

天乙更貪修養術昔來劫盜惡

聲揚首尾氣豪多勇毅居財一似雪和湯兄弟犯隔

他鄉田宮祖產破狼當子息女多男巧妙僕夫偷走

急忙忙

水在三宮兄弟離別四宮破祖業
五宮男女多巧妙六宮主奴僕走

妻位主妻

多外染厄宮腰腎也羸羸遷移處好遊商官宮早歲

甲科昂福德自然多福壽貌宮儼雅性溫良從頭說

盡人間事後學須教仔細詳

水星善惡本無心同處尤宜吉曜臨最怕惡星同入

陷平生浮泛不能禁水星如傍火之精火土同行何

許清若與金星相夾帶平生天下有才名○晉地相逢土反宜衣豐食足不須疑若還更伏太陽下萬事和平福可期○雙女宮中得逢金超昇富貴已宮臨金水共蛇蛇會處科甲必定稱人心○水人以木為兄弟壬癸生人亦如之吉曜重重在此宮兄弟五人五箇貴太陰屬水再逢水雨水令人多智慧反成愚鈍本無他只為金牛非正位○體貌洋洋得水星水星又為火同行相濟相傷成福德只憂田宅主多更

○太陽紫炁并水星若當本命富還清富主堆金仍
積玉貴時只是自清明○六合相逢金水鄉多能相
貌更堂堂木星隣近多淫亂却主資財壽命長○水
逢吉宿便興祥莫使凶星共一方若值孛來同照命
一生性毒好爭強○火星若與太陰同作事從來不
見功好競到官常失理夜生方免獄瘟凶○土人得
水不為財反於財帛起悲哀破蕩田園死妻子亦愁
宅舍化為灰○水星辰上仍逢水若遇太陽本富貴

莫教別有一星來不可圖名且圖利○水入紫炁先
喪父戌未水星當尅母為人持重有文章直待晚年
方發舉○火入強用水為官土星同位主孤寒從教
學館星光曜空讀詩書自小頑○太陽元是火之精
子丑宮中並水星若在邊傍應為福定須科目振聲
名○水星臨日性淫邪紫炁同宮命曜加子午卯酉
四處命平生只是愛貪花○同金多欲火貪婪晝夜
相逢多夭死字計相逢邪佞人晝則吏戎僧道爾○

金居亥火絕男兒三十年前未見妻若也有須生死
絕真金必定化為泥○水火相刑第九宮土羅對照
賊徒中三方若在高強位日夜貪謀作貝戎○水主
文筆的作奇木金西沒並光時一星乘旺三方位須
作龍頭貴格推○辰星在巳旺非常與日同躔列軫
鄉假使不登黃閣貴也須官至翰林郎○水星最喜
遇金奇富貴須成少壯時凡有所為無不利更知有
壽到期頤

水星殿局朝元

水星附太陽曰玄武持旌在獅子午為正殿居申子已亥為本局愛箕壁參軫四星為朝元身命太歲臨之文章華詞翰苑之任六庚生人最佳

水星廟旺樂順留伏逆

廟旺宮 水入雙女已上名為文昌玉堂星凡人若是本宮帶祿馬更官祿宮有吉星兼行五星順段便斷為至貴若不行本限只身命相應更見祿馬只作

龍圖給諫翰林命斷若論科名應在第二三四名前
若有救星作賢良出身若在此官留伏逆段減力
仍看他星斷之兼內品之位

樂宮 水入陰陽申位上名為天鸞利英星若人遇
之皆有文學更有吉星相應便作京朝斷之若無救
星只作名流上等清貴若伏留逆段皆減力只主伶
俐如在別官減半福更若吉星同臨便應外臺

順段 水入順段名為天犀天科星凡人身命遇之

更看主星便作品貴之格若論科名多主二甲四甲
大凡看命若斷科名先看此星為準仍看祿馬得地
留段○水入留段名為黃道台星凡人身命遇之主
聰明只發薦不登科有救星加三分○經云水入留
段號天囂榮妻寵妾是前因主星三合妻宮位亦可
文章以立身

伏段 水入伏段名為天鳳天井星若人身命逢之
多主口舌是非為事不定淺薄若得祿馬入格有救

星必多巧藝更主星在強宮者貴○經云水星伏段
名宿汨為人作事尚匆猝主星前後三宮行情性無
常多恍惚

逆段 水入逆段名為厄折窮哀星若人身命遇之
識見機關陽宮多智陰宮多詐更會祿馬貴人作貴
命斷如在低宮夜生多學傷口過招是非○經云水
在前逆名厄折致難見災常切切主星之後第三宮
好色貪淫無限節○水在後逆名窮哀為患為冤不

金
卷之四
可猜主星對日須有位貪淫迷色損傷財

水星躔宿俱出玉關經玉關歌

水躔角宿號天成 清秀文章學術明

喜怒無常心不定 平生財祿自豐盈

水居角位有金星 金居龍位好辰星

水角得金分外貴 金水相潤有精神

水躔亢宿號天津 容貌清奇通道術

心清閑暇作文章 多學多智善音律

龍頭水潤有高功 最喜學堂四正宮

女必聰明男學士 祿主權方達聖聰

水躔氐宿號天旨 言語聰明知道粹

人情好惡性能通 遇吉終須文學貴

氐宿所屬卯與辰 水居初度福堪論

八度深躔尤怕火 水火相戰是閑人

水躔房宿號天淫 智識聰明如賢人

衣祿自然心泛濫 文章學術妙經綸

房宮日鬼向東家 水臨此地不堪誇

日鬼不堪辰曜立 水到東居勢位差

水躔心宿號天凌 清潔為人快性情

巧計多修文業秀 聰明才藝二三分

心宿從來樂火臨 水遊火分勢難禁

火須于心居大火 水焦火位病來侵

水躔尾宿號天澄 理義該通學術明

資財耗失多災否 惟恐風狂染疾人

尾宿亦怕水星遊 火虎從來水不流

虎若在寅正所屬 水臨此地福難求

水躔箕宿號天淫 心閒快樂任天真

平生衣食資財足 道藝文詞足講論

箕星好水水相宜 水豹周流日日奇

上下相流堪作福 水木相扶却有依

貴格云辰星偏喜度經箕 丹桂須攀第一枝

水躔斗宿號天德 俊譽文章心耿直

子孫榮貴更氣和 衣祿豐盈言語澁

水來斗宿莫臨妻 必定難婚事涉遲

若在餘宮怕吞尾 水氣相逢恩蔭奇

水躔牛宿號天甄 朋友氣和益子孫

心謀機密人難測 財物多應得外人

水牛相會貌超羣 處世榮華蔭子孫

只憂計字相臨照 凶暗乖離受苦辛

水躔女宿號天驛 眼疾朦朧是貴人

貪財好學多議論 平生衣食也艱辛
女星更好月同行 陰曜同陰祿可亨
若見土星同度立 妻兒孤尅自無成
水躔虛宿號天駟 清潔為人財祿臨
多能技藝心慈善 孝順終須樂弟兄
虛星星月水中求 水星到此福高丘
須要吉星兼祿主 若無留逆福綢繆
水躔危宿號天中 語澁心艱眼半朧

中末之年方得力 外人財物稍寬容

危宿本是屬水宮 水無定度木兼隆

若是留遲方定貼 更逢廟旺反無功

水躔室宿號天攸 文學聰明智慧優

歷事未能心預測 算籌多計樂閑游

聰明文曜水星精 臨室度中喜順行

若作科名并祿主 安身坐命祿安榮

水躔壁宿號天池 智慧多端有志機

天文玄象多通會
衣食平生也不虧

壁宿在亥號天宮
水要加臨壁度逢

水從此宮元甚妙
須逢福曜木尤隆

貴格云水星度壁福偏隆
挺出千羣推第一

水躔奎宿號天凌
忠直為人性急煩

財祿自然多積聚
平生多事不安閒

奎星七度過乾宮
水曜臨之福不窮

若是深行宮度分
白羊水浸實難容

水躔婁宿號天漸 耿直為人不受欺

衣祿豐隆多稱遂 平生快樂勿凶危

婁宿從來屬火棲 水還同度固難為

水浸白羊終汨沒 縱逢祿主亦凶危

水躔胃宿號天泓 耿介於人記事明

忠孝有心多執滯 為官衣祿未安榮

胃宿水星切莫逢 天羊孤角自生凶

水位更逢夜裏土 修書無氣更顛蒙

惟藉金星同度分 方居福祿號文昌

水躔昴宿號天閭 容貌清奇識五音

心謀巧計事沉靜 衣祿平平禍不侵

昴位正屬金牛宮 水躔金宿氣英雄

若是主星兼氣力 少年聰俊廟堂中

水躔畢宿號天淋 歷事三思性又欽

容貌清奇衣食足 文才學問滿胷襟

辰星水蛇方躔畢 八度如何有貴榮

逆伏留連皆不吉 若行順旺稍聰明

水躔腎宿號天樞 清潔為人足智謀

多財多藝多工巧 歡樂平生好遠遊

水星聰慧主文詞 四七之宮不喜腎

孛曜同行來此地 色慾貪歡只為斯

水躔參宿號天湫 歡樂無憂足計籌

作事未能心已怠 豐衣足食自優游

水臨參宿正廟居 文星入廟要因扶

水性聰明專好動 因能自執不凶虞

貴格云水曜經行參宿度 貴榮廊廟位三臺

水躔井宿號天潯 心好清閑志曉明

籌策文章人薦用 聲名遠播定官榮

井為木杆未宮棲 水來此地福相宜

井有水星須得地 此為富曜福希奇

水躔鬼宿號天洪 好靜為人更美容

心裏洞明策道釋 衆人欽用樂無窮

鬼星正管未宮陽 水鬼相躔未可當
此曜順行宜見水 水孤井立必孤孀
水躔柳宿號天汪 為人柔善會文章
巧計多謀心不定 聲名閭里自揄揚
柳星所樂水相從 水扶柳曜最從容
柳綠更宜流水處 科名騰播達宸聰
水躔星宿號天清 伏見皆能官職榮
與日同宮須大用 定為喉舌顯朝廷

火星居地水爭衡 星宿騰輝水路亨

水宿星官多巧麗 文成七步氣鏗鉤

水躔張宿號天榮 富貴雙全性又靈

文武才猷皆並用 賢才兄弟樂平生

張度水星衆所欽 每臨身命福資深

必能顯赫人爭羨 名譽昭彰達古今

水躔翼宿號天異 年少登科文學貴

清華要路驟遷榮 與日同宮須大貴

翼宿八度至十三 員明淨潔水來參

不論遲留并伏逆 當居科甲有文談

水躔軫宿號天岑 文學之官衆所欽

聰明謀畧人多會 藻思文章入翰林

軫宿本是水樂宮 水星入廟福尤濃

上下同流為樂曜 男人多學女人聰

水星行度

水星在星宿三度十六分以上至七分為向廟至張

五度為正廟在陰陽宮為本宮旺參宿為樂宮在雙
女為旺宮翼宿十二度為次旺宮軫宿四度為正旺
居此生人聲聞四海

辰星星為員明水之廟也不以伏逆順見皆主大貴
常居一人之前後有出人之才為喉舌之官若臨雙
女宮翼二度及十度為好樂之宮及為旺度與日同
到少年便貴歷清華之選若日在軫水在翼為宰輔
之任日在翼水在軫為文學之官水無正性以對合

為性近金好音律兵戈近木好近貴人近火土貴則
貴賤則賤近蝕神好偷盜近孛好殺近天乙好神仙
之事入宮十五度以前好文章十七度二十度好醫
卜二十一度至二十六度有見識好潔為僧道二十
五度至三十度近日則吉遠日則凶若伏逆皆為技
術之巧與金相好與火相惡

日度主性格溫厚內剛外敏聰明有才智衆人見重
是主星晝生有位夜生大富不是主星晝生文藝出

衆不貴夜生性巧因道藝立身後必富

月度主性聰明有信急性多巧多嗔有貴位

木度主多智謀書算多男女能行義事為事吉慶非
主星多災

火度主多災厄為性不定多毒害有機密識量因妻
子有厄損財主患風狂木見減半

金度主性格聰明英雄多才智好兵法知未來之事
有聲名足財帛王者用之授斧鉞木應轉好是主星

貴不可測亦因女人疾妬之厄

土度主損兄弟因男女有厄婚姻不定或娶在他州
有暗疾災躔或損一目多貪財論訟火相尅則死木
相應則免

水度主足文學有聲名常快樂能講論足財帛女人
有厄

水星入宮

日宮主聰明文學白日轉加大有文學聲聞四海好

圖書有道藝合得國王重用多因貴人喜愛夜生有財非主星晝生文藝出羣順行並貴夜生微有福

月宮主聰明工巧好文學得貴人見重因此成立為事不顧危亡是主星有位非主星因武藝立身致富木宮主聰明出羣智量深遠合道理明玄象知好惡能知人是主星多近君王左右得貴人見知非主星微有福

火宮為人性沉厚作事方圓有心機好道德明音律

禍福預知人休咎凡事有成伏逆諸事難決是主星
夜生有位晝生有財非主星夜生有福晝生技巧非
貴也

土宮主性凶猛見善行善見惡行惡言語溢心細難
測得外人財物主患眼目是主星微有職位非主星
多非橫之災善星救之可免

金宮主形貌端正心性寬多憂惱能音律與人為師
水宮主聰明急性能知人智量方圓見事長有文

藝是主星夜微貴晝生富對照三合性格亦同福力減

水星同宮

水木同宮有智慧足文章大人委用有貴子

詩斷木星喜與水星俱 水賜洪休慶有餘

百六會時千福備 等閑平步入雲衢

水火同宮主富心平多奸惡

詩斷火星怕與水星交 困苦傷殘百事消

藥廢凌遲逢百六 夫妻父子總相拋
水金同宮主食妻祿富貴少年榮顯足壽

詩斷金水二星若相會 俯取官榮如拾芥

大凡遇此喜非常 百六逢之俱吉太

水土同宮多滯言語不快會文章日生吉夜生人主
年九十

詩斷土星若會水星同 學行孤高膽氣雄

秉節揮戈文武備 福來百六慶無窮

水羅同宮不論晝夜生人少疾衣食平平至霹靂之
難宜念善

詩斷水星最忌與羅同 說計無慮一世窮
不孝不忠多暴雷 不然瘖啞與盲聾

水計同宮主兵刃寇盜之厄

詩斷水與計都相照會 缺唇跛足并駝背
或生癰疾女多淫 或是逃亡與結配

水字同宮主貧賤

詩斷辰星不欲相交彗男可為奴女可婢

邪淫奸宄主貧寒畢世十謀無一遂

水炁同宮有財祿足壽

詩斷炁星若與水星同天產其人福勢昌

官爵顯榮家又富千斯倉與萬斯箱

紫與水星能作善厚德純性學神仙

醫卜伎巧多文藝一生福壽兩綿延

琅玕經節要

水乃陽曜喜樂陽星輔日而行助其光熾主方廟旺
卿侯之職水木同宮貴重祿豐加之炁月主順興隆
水乃陽星宜同太陽晝居廟旺官至卿監

水木同宮主高貴豪富更加炁月貴為守帥重職同
金多欲遇火不和貪婪無足為事妖訛計字加臨非
節非忠夜生尤順晝則藏凶

水星同金居廟旺遇火羅照雖受衣蔭主淫濫破田
業晝夜不順必夭壽如同計都字夜生則吉亦主性

不忠良晝生見之非戎吏即僧道或免凶害即主刑
傷不仁好殺

晝同土曜富盛可期順則廟堂與身肇業仕宦亨嘉
居官名節夜則湛薄貴而歇滅若遇留逆多屯苦節
水星見土白日見之順行廟旺則貴而忠信官位興
隆官至守土夜生減福在強宮則富掌大財留逆促
壽損尅妻子不死則帶篤疾中風之患

羅睺樂旺掌權之多陽宮祿厚陰夜蹉跎

水同羅睺晝生陽宮則貴領重權祿位高厚雄貴出
羣夜生陰宮尅剝刑傷貧窮下賤身難卓立

最宜旺位炁木同行晝逢吉曜福祿轉增

水星照臨十二宮

命宮

守照命宮形質重厚體貌威嚴舉措有成性快寬厚
多學多智有頭無尾柔中之剛奸中之義心有謀用
不懷遷怒此星入命專主性巧文章尅世筆陣超羣

一生無大驚恐災厄逢危不危險不險大事成小能
順人情若見惡星則反吉為凶見善宿則變禍為福
寶鑑歌云水星入命最為精危厄災逃自不成逢惡
則凶見善則喜入廟主少年及第在酉宮女有命服
已申巧性文章外成藝業口談到未謂之八極星一
生福祿與紫炁同在命好神仙黃白之事與日金同
為輔弼格最吉惟水滿三用吉多則反凶謂之無救
樂旺中主大發財正好處則死蓋水不欲滿用故也

金木同位同行少年及第在陷宮不伶俐與火星相
惡金星忌妬與日同行多主淫慾忌享及計同○水
照合有文章才學多智識心性無定主

詩斷水星臨命智多能 引薦求財事不成

廟旺遷官榮爵秩 餘宮僧道晚年興

水德星辰在命宮 得逢旺處便攀龍

聰明智識多機變 生在榮華富貴中

命宮只有一水星 蓋世文章異衆人

父兮生我今何在 不見登科出仕林

財帛宮

水入財帛幼年多散○水照有文章筆上財帛之分
衣食中年少稱意

詩斷財帛宮中遇火爭 一如把火照霜冰

此二宮中逢此曜 初年囊橐盡皆傾

第二星辰在弱宮 飄飄財帛去如風

若無惡曜來衝破 却曉魚鹽水利豐

兄弟宮

水星主多姊妹難得力○水照兄弟隔離他鄉
詩斷水星吉曜遇還稀 來照三宮便不奇

上有親兄下親弟 兩頭無義便侵欺

水星到巳正乘旺 最嫌金火來相傍

太陽若落在前頭 縱是後生亦先塋

田宅宮

主自成立又云若臨父母永年齡○水照主先破後

成田產多因外方立家成活

詩斷善星一曜是辰星 得入強宮福轉精

不見當年刑忌照 便須萬頃與千贏

四宮遇得水星光 吉助先令母壽長

文華一遇登科早 為官食祿及爺娘

男女宮

端正至老得力在戌位則招偏庶異色之子○水照
有聰俊之男見多者只招一人之力

詩斷辰星高照子孫位
俊邁文章為國瑞

水數推來只一男
振起家風日榮貴

奴僕宮

雖有奴僕鞍馬亦多主失竄○水照奴婢六畜多損
害

詩斷水星旺處旺牛馬
却多奴使性難驅

雖然萬物總由分
所為稱意自安居

金木同來奴婢宮
前有太陽男女貴

只用五六正相鄰 名達天朝振經藝

妻妾宮

妻宮端正談論聰明手足纖細中道亦主生離死別
○水照主妻性不定多外情及奸盜

詩斷水照妻宮對照命 富貴貞賢福難並

忽然惡煞來相侵 心濫情淫性無定

疾厄宮

少災又云在疾厄時常疾滯○水照須防江河之厄

亦主疾病

詩斷第八宮中水德臨 溫柔情性足人欽

忌星凶惡來侵犯 沉溺波濤墜井深

遷移宮

水入遷移所謀稱意○水照不利舟行防有風波之
險厄

詩斷水星合照最為珍 更看東生命位星

賓主和同無惡犯 遷移出處總歡榮

第九宮中會金水 金水太陽同一位

更加本命對宮濕 屋宇既多尤壯麗

官祿宮

主多口舌強仕以前主有官非相染亦忌婦人憂擾之事○水照主官職驟遷

詩斷水星偏喜照官宮 出類超羣福自隆

委任股肱扶寶祚 官居高品貴侯封

官祿陰陽水到寅 不然火到亦為逆

自言健訟誇無敵
破散田園自有因

福德宮

君子得之早年亨通一世優游晚年以來財帛大旺
庸人得之得力得財中年橫發衣食自然所謂不栽
一株桑箱中有餘服不種一畝田倉中有百穀○水
照有聲譽貴人舉重之喜只一生不宜陰人交性多
反善為惡尅身之事

詩斷十一宮中水德來
汪洋智識仰賢才

公嚴厚德人欽重 澤被生人遍九垓

相貌宮

身形肥小而不瘦神氣清高容貌端正○水照主人
好華得陰人喜重

詩斷水星相貌最為強 清風凜凜肅冰霜

若遇惡星無惡曜 容顏端正動君王

相貌宮中遇水星 機謀多計足嚴明

雖然羨客豐衣祿 祇恐飄蓬破六親

水星變段名

寶瓶宮玉池星○又名天宸星主巧妙聰明得北方
祿

詩斷玉池本是水之精 學館科名萬事亨

更有惡星相照視 便為僧道也聰明

磨蝎宮沉晦星○又名天殊星主貴人欽羨文學

詩斷水星且地為沉晦 疾厄遷移溺水津

妻妾主逢妻不潔 男為盜賊女風塵

人馬宮滲漏星○又名天樂星主歌舞好舞能謳

詩斷寅宮滲漏水為凶 六宮疾病命相呼

對照傍臨無吉曜 一生辛苦受貧窮

天蝎宮仇讐星○又名天狡星心性狡猾不誠實

詩斷太衝水宿號仇讐 貴賤命來由爾招

若值字星羅土計 零丁親屬定應消

天秤宮玉龍星○又名天貪星主吝財物招是非

詩斷角亢辰星號金龍 更加金水喜重重

學堂四正無凶煞
馳譽蜚聲翰苑中

雙女宮玉女星○又名天驄星俊傑文章巧妙

詩斷已宮玉女最為良
更得金星佐國王

男兒得此官榮顯
女人逢此有冠裳

獅子宮天目星○又名天妙星文才巧妙

詩斷午為天目水高貴
色衣子息皆聰慧

更加四正福星臨
鮮讀詩書文美粹

巨蟹宮巧計星○又名天厭星主遭人厭枉屈

詩斷未為巧計美容顏 破蕩莊園賣祖田

若被惡星相照合 機關巧藝會千般

陰陽宮紫微星○又名天德星福祿全美

詩斷陰陽全會紫微星 富足奢華有始終

更得妻財增貴盛 子孫榮舉孝廉中

金牛宮失偶星○又名天傾星隨世情逐高下

詩斷水星失偶到金牛 兩取三婚尚未休

女子若逢三度嫁 不然離祖在他州

白羊宮天剛星○又名天巨星主事沉毒坑陷

詩斷天剛白羊男女怕切慮大限損天年

更逢月孛同宮度定遭刑獄及顛狂

雙魚宮玄武星○又名祿崇星主福祿超崇

詩斷亥宮玄武水之精掌握樞機果不輕

官祿遷移兼福德何愁方外不揚名

星學大成卷十七

欽定四庫全書

星學大成卷十八

明 萬民英 撰

三辰通載

六曜

太陽

總龜算法置積日減一算以三百六十五日二十五
分五十秒為一周天之數除之冬至行盈度夏至行
縮度漸盈漸縮不可槩論今以盈縮中間率行一度

筭之

冬至日行一度五分時行八分七十四秒

小寒日行一度四分時行八分七十六秒

大寒日行一度三分時行八分四十八秒

立春日行一度二分時行八分四十九秒

雨水日行一度一分時行八分四十一秒

驚蟄春分日行一度時行八分二十三秒

清明日行九十九分時行八分二十四秒

谷雨日行九十八分時行八分十八秒

立夏日行九十七分時行八分八秒

小滿日行九十六分時行八分

芒種日行九十五分時行七分九十六秒

夏至日行九十五分並同上

小暑日行九十六分時行八分

大暑日行九十七分時行八分

立秋日行九十八分谷雨同

處暑日行九十九分清明同

白露秋分日行一度驚蟄同

寒露日行一度一分雨水同

霜降日行一度二分立春同

立冬日行一度三分大寒同

小雪日行一度四分小寒同

大雪日行一度五分冬至同

太陽論

太陽日宿火之精一名密星其色紅赤其性寬厚人君之象父之所配與衆星同道諸星皆畏服五星三合與對望皆留逆而不行其次舍一月一宮一年行一周天生於蓬島之間出入扶桑之內卯酉為出入之門至午為中天離明之地天光所及照燭無私太陽出於卯故卯上立命隨父所在故也惟獨守宮則權專諸星為之輔佐其星廟戌樂巳好辰喜寅旺午怒酉

琅玕經云日旺奎宮發有因祿名上達秉臺鈞張星
木度須高職水火同方侍從臣寅位晝生財祿重月
華照合顯榮臻蝕神惡曜俱相背福壽人間未易倫
○賦云日出扶桑遇白羊而金烏照耀又云末歲亨
通定是日月居子午初否後泰日月入身命之宮又
云家藏金玉從來日在金宮日生見之會金木水星
於命入廟及在午皆主貴品清職文學聰明大怕計
孛火土同臨弱地則曰交戰疊刑若只與火同宮多

破祖上物業父須有尅○經云生時火伏日同宮先
代家資盡消滅若會羅計二宿必主交蝕遇之尅剝
父母陷害骨肉夜生見之則其明背

乙生人以為文魁星 丙生人以為催官星

壬生人以為魁星 安命在子以為科甲

安身在午者為學堂 安命在卯者為官星

丁巳生人以為天官正祿星

此星配屬寅午戌三方主

太陽歌

七政昭回日最尊配人父道象人君晨朝杲杲從東

出萬國葵傾煖似春

日為七政之尊人君之象又配父道愛日生人照人命

守人身員滿形容性又溫言語殊常人仰重處心無

黨更無偏

太陽照入身命主形容員滿言語殊常人皆仰重無黨無偏

或與歲辰

相會合文章卓瑩動乾坤

若木相會主文章

金同位好婚姻

妻家財物送來頻

金同得妻家財

夜見土星晝見火須防病

患及尊親首尾更來須惡死紫炁縑流及道門忽有

字星來邂逅療勞說盡父根原

夜土畫火主父殘疾
尾首主父惡死天乙

父為僧道月
字主父勞瘵

臨財帛聚金銀第四多招好佃賓

太陽
守財

主多財帛在
四主有田宅

閑極位中兄弟貴子息賢能止一人

西沒美妻顏似玉入宮一世沒迤邐第九位莫逡巡

外鄉近貴有黃緣

外鄉近貴
人提獎

官祿有官兼有祿福宮

福德自安閒一一從頭言仔細請君愛惜莫輕傳

人馬尊崇拱太陽喜寅辰已怕酉鄉最宜官祿兼臨

命東出尤嘉福壽長○金水如同廟旺方俱來入命

喜非常更得太陰相會合是為慶會也輝光○太陽之宿號尊星衆曜相尋如轉輪凡有吉星伏居下不能致福反平平○太陽入祥遇木星更添命主必官榮若有二星來轉佐必當榮貴事王廷○午宮旺廟最為奇更在強宮始得宜若或陷於閑極位少年父命必凶危○太陽次喜白羊宮必定其人祖業隆夜見土星晝見火不能致富反為凶○太陽與土八宮逢夜生惡貌并孤窮早失雙親路途走茫茫不識是

西東○太陽在命九品遷小人富貴足庄田三合近
強看仔細陷沒沉宮事不全○炁木日月最為良儻
無惡曜不相妨如逢太乙同對合智巧多財柔乃剛
○初限不如中末良夜生不如晝生強只怕計字并
火土總同廟旺亦為傷○太陽魯分入奎初此是人
間大貴圖更得官星行旺地安榮終是入鈞樞

太陽殿局朝元

太陽居白羊獅子為本殿臨子午卯酉為正局坐房

虛星昴四星謂之朝元衆星叅奉曰日帝受朝陽位
值之名曰御極當為要職若本命太歲值之受皇恩
蔭覆世代受祿羣曜取次必主調和鼎鼐

太陽躔宿俱出玉闕經玉闕歌

詩斷日躔角宿號天成 晚年須富少年貧

心高膽大超人衆 必定前程有大名

太陽度入東南角 莊重仁慈性端慤

木金會聚宿皆同 大立功名有才學

日躔亢宿號天柱 學問文章貫今古

為人歡樂最賢豪 性識孤高名未遇

亢宿從來號金龍 五陽辰位日居中

木曜傍臨傾向日 富貴雙全祿萬鍾

日躔氐宿號天符 美貌堂堂出衆徒

性快心高多自耐 江湖漂泊少年孤

氐宿屬辰并卯炁 此宿辰宮氣未充

晝誕孟冬受正氣 壽年長享永無疆

日躔房宿號天祿 清潔為人享清福

高才富學有聲名 耿介超羣還不俗

太陽東躔房日鬼 出自東方偏喜遇

若加本命晝朝生 發福高權貴而富

貴格云太陽東出度星房 腰下須懸金印黃

日躔心宿號天昌 白日生人福壽康

若至晚年尤享福 一生終是足衣糧

東華唯有心三星 水火同居氣未清

若是土星同字位 陽居此位勢難禁
日躔尾宿號天枵 白日生人富益饒
性急多才人莫敵 夜生鄙俗事煩騷
太陽來尾漸東升 晝產皆為上貴人
木炁更臨加品位 夜生疑慮却多驚
日躔箕宿號天魁 俊又文章有大才
父母定須生貴子 官高位顯列三台
箕宿從來更好風 東風解凍氣朦朧

水曜並陽同度立 其人定天必須窮

日躔斗宿號天明 剛勇施為膽氣英

產業經營辛苦志 老年豐富享安平

南斗東西有度分 衆星高拱太陽尊

貴人天乙臨其上 手足名臣輔相人

日躔牛宿號天機 機變尤長文藻馳

更得木生來贊助 榮貴聲名天下知

金牛磨蝎女之中 日度逢之福轉隆

此曜最尊怕忌宿 喜同土火廟宮豐

日躔女宿號天德 清秀聰明多智識

天文玄象性孤奇 白日生人最為吉

太陽與女共相齊 性不庸愚德也迷

但遇炁星臨此度 反災為福立孤睽

日躔虛宿號司天 耿直聰明膽氣兼

白日生人多富盛 夜生逢此足連連

太陽躔度到虛城 不論賢愚與富貧

高坐華堂延壽相
從容穩步作公卿

貴格云日曜正躔虛宿度
官居輔弼掌鈞樞

日躔危宿號天隆
性直文章學問豐

營運資財難積蓄
老年方見免災凶

危宿中隨虛室居
君陽危立勢難為

虛室兩星前後立
位而無輔豈非危

日躔室宿號天福
膽氣權謀性多慾

平生歡樂少迤災
父母康強延金穀

太陽一曜最為尊
室宿臨之豈晦昏

惟愛木金同廟度
此為君象鎮天門

日躔壁宿號天皓
富貴雙全兼壽考

多男多女見威尊
必值文章榮達早

壁居亥上正天門
日月同宮合壁連

更有金星同水至
水金輔日有高權

日躔奎宿號端守
富貴榮華年壽久

文章高貴衆難加
白日生人享富厚

奎為玉關號王車 日曜臨之福不殊

木曜更來辰上位 腰懸金帶佩金魚

貴格云太陽妙度最宜奎 閩外鷹揚萬里威

日躔婁宿號天宮 大尹公卿將相逢

年少便應居鼎鼐 生時值此必興隆

西方婁宿號白羊 金婁西沉日不長

誰識夕陽猶返照 白羊宮裏勝扶桑

日躔胃宿號天解 令德惟賢位安泰

機謀才畧多智能 有喜須因賢淑輩

天上太陽臨在胃 夜生背明真可畏

更逢羅計火孛星 不尅雙親身必墜

日躔昴宿號天房 耐事經營足食糧

脾疾冷涎身有壽 日生却得世榮昌

太陽遇昴福興隆 勛業超羣志氣雄

四月卯時人不壽 駒陰過隙霎時中

貴格云密星遇昴福偏隆 超羣必作人間瑞

日躔畢宿號天強 賢德才高萬事昌

音律善通憂慮少 心多嗜慾行無良

畢宮好雨曜昏迷 陽居東位不宜西

須要歲星心位立 正臨扶日不終危

日躔觜宿號天鈞 足祿多能享世榮

學問淵源才挺出 此人名必播朝廷

觜中日宿是凶星 陋短形容菜色青

主性頑蒙多暗昧 縱教修學也無成

日躔參宿號天水 冷淡持身欲不累

少才多學富聲名 官宮有祿終須貴

水居參宿正居坤 紅輪西墜福難言

須要木生寅上照 酉時日沒正黃昏

日躔井宿號天弼 冠世文章增福力

公侯卿監世間榮 福祿恩波傳子息

惟有井曜未申宮 日躔井度要深逢

十七度中尚在未 向南之地有高功

日躔鬼宿號天流 先代資財用不休

巧計機關人莫測 世間多事出陰謀

鬼宿從來怕日逢 此生惟有夜生陰

惟是邪星莫干正 鬼金羊位日陰沉

日躔柳宿號天梁 仕宦須令仕本鄉

金帛豐盈多積蓄 晚年須見祿榮昌

柳星漸次屬離宮 十三度內未遭逢

二七度中惟得日 方逢午位壓羣凶

日躔星宿號流澤 卿相當朝須得力

三方星主旺高強 富貴榮華主輔弼

看來午位有三星 一張一柳一星明

惟有張星樂月鹿 君居此位有虛名

貴格云君日周天位在星 功齊傳說位阿衡

日躔張宿號天正 才智聰明文武並

官星得力善星居 祿貴兼全增喜慶

太陽尊曜臨張月 縱有聲名多歇滅

休將此宿在廟堂 錯誤於人難可說

日躔翼宿號天婁 賢德文才出世豪

若得木星同位次 定應官職守清高

太陽翼宿不堪親 翼火為蛇死不明

大主不祥非橫死 疾宮又遇惡星辰

日躔軫宿號天階 年少功名自鼎來

端潔為人須大量 定須九棘與三槐

惟有軫宿號天極 人言陽極福難當

日到南宮終熾盛時居大廈佐君王

太陽行度

日在奎宿七度六十八分以上至十三度六十八分
以下則是火度日是真火為正廟若在五度以下為
向廟十三度六十八分以上為背廟日在婁宿八度
十八分以上至九度為正旺九度以上至胃一度十
八分以下為次旺以上為背旺在八度十八分以下
為向旺白羊宮躔婁宿九度為旺度如在八度前必

為大卿及大尹三十年居三輔六府或監國負宸設
政忠孝恭謹大堪委用如在八度以後即稍減力顯
達六年如在九度主員郎少年貴久後無力牛獅子
宮星宿為樂亦為卿相旺三十年須在有力之地或
三方主身命宮在高強宮分相照或得諸星助之更
在廟旺之宮則為至貴之人在五弱宮惟寅丑辰上
或見木對欲順不欲逆三十年富貴位至三公或在
申戌之位見木逆則為大富之人與金同伏者女人

富貴作夫人如夜生時見蝕神賤不得其死

日度主性忠直有道藝宜仕宦得貴人委用有聲名
平素有福作事長遠更是主星晝生有位近君面員
耳聳眼大主大貴

月度得父母力為事有密謀見事深遠善主財是主
星有位不是主星大富木度主貴達平生多福合仗
本鄉官多見金帛晚年主富火度主作事清直殊常
有福性直不顧危亡多厯江海

土度主貴人委用宜男女亦多伎巧微貴或虛貴

金度主好音律歡樂多怨少仁平生多蹇是主星晝

生加福力有貴位

水度主財帛豐足多學多智潔淨多好使錢有貴人

扶持

太陽入宮

日宮主作事明白足學有智好修善有玄藝是主星

晝生有位夜生有財非主星晝生大富不受貧苦

月宮主得父母力為人性密作事難量立機謀與人
結交無終始少年遠行損財是主星老年大富非主
星微有福力

水宮主為人聰慧作事有斷多心機善主財足財帛
少苦老樂火土同宮妨父母兄弟是主星晝生轉加
富貴與羅計同宮主災禍

火宮主為人性微急作事明白知人災福多智見足
財產父多病男女亦然日生人及在陽宮轉佳夜生

減半

土宮主為人性沉厚有威嚴能營運善斷割多財物
是主星晝生大貴夜生大富不是主星晝生少孤獨
微有福力更在土度則凶

金宮主有賢德知未來事因女人有喜多計謀好關
戰有好妻妾及子孫兼主殊常有福

水宮主性極聰明智巧足文才所為不定能守事常
患冷疾會天文晝生是主星大吉

太陽同宮

日月同宮主多聲名好文章富貴有科名若晝生人
日是主夜生月是主更日月在旺廟宮及本宮其人
聲聞四海又合得國王重用在未宮衣食至老無退
在戌辰二宮甚有鞍馬牛羊

詩斷日月相會歲歲同 十二月中月月逢

正月姍姍終玄枵 聖賢降世福興隆

日月慶會吉無涯 天產英雄福邇遐

百六會時邦國泰 人生值此福奢華

日木同宮主近貴人平生少災有福足財帛多子孫
更得木星乘旺氣轉好是主星大貴如木星行伏段
損財產日在廟則貴

詩斷太陽交會木星臨 足祿多財冠古今

平步青雲昌熾盛 萬般好事稱人心

日火同宮主為人 有信行作事方員好文章多財物
若得一生在旺宮者主貴

詩斷日火相逢火失災 禍盈百六莫逃潛

天災遇此民遭厄 天喪生民害義廉

日土同宮主性格聰明有詞章若是主星晝生日在
後大貴日在前損父母財產及主惡死月宮尤重亦
主父有疾

詩斷日土相逢慶瑞饒 產人龍首佐昌朝

星臨百六邦家泰 萬福攸同百禍消

日金同宮主好色慾有好妻兼有妻財夜生金在前

日生金在後皆主大富貴有聲

詩斷日金相遇福生民 必產奇才異世倫

百六會時天福熾 當知慶瑞在今辰

日水同宮為人聰慧好脩陰德是主星不伏逆其人
文學出羣有科名不是主星順行者主微貴有職位
雖有文章不主文中成事多因父母立身及貴人舉
荐成立若伏逆者主有技藝好音律若是日主在本
宮畫生大富夜生微貴

詩斷日水相逢慶瑞盈
欣逢水日賀昇平

人生值此人中瑞
間世奇才保大名

水日同宮得地行
不能及第也聰明

性淳機巧難容事
贏得鄉間有雋聲

日羅同宮主不壽身近貴

詩斷太陽正照被羅侵
父在他鄉兒沒親

先代家財皆破盡
奔波衣食不如人

太陽朔日怕羅睺
偏產奸雄起篡謀

餘日當之興福處 惟逢百六禍堪愁

日計同宮主多疾厄有腹肚之疾多脫財物

詩斷日計相逢景福昌 官尊直諫佐明王

怕逢朔日生姦偽 百六如逢大不祥

薄蝕皆由惡曜侵 那堪又在一宮臨

破蕩田園皆瓦解 東西南北不寧心

日字同宮宜在外邦不宜在家白日生多災

詩斷日字相刑名字損 反產吉人心惻隱

姦臣叛世不生茲 百六會時保安穩

日紫同宮多伎藝官至三品父有尅害有疾可免

詩斷太陽紫炁喜相逢 澤潤生民稼穡豐

百六遇時祥瑞盛 人生會此必三公

琅玕經節要

太陽照命金水同位廟旺主方上達之貴炁木月同
顯赫可致

金水日同宮謂之輔弼格若得地主文章大貴次要

得地為限仍須日生如是夜生只富而已有此三星在陷害宮則凶炁木日同對或三合見有即主聲譽之人更各居廟旺居官清顯位近王庭

不係主旺亦主富貴主下身低無不掌治

如不在方主不入廟則為官不顯亦衣祿不背富而不厚矣

水日同宮財祿可及字日對同機巧可取才幹及人橫招財利

日與字同對合照主性機巧作事靈變好音樂智見
高有膽氣柔中之剛多矯詐招外財他息
非其主旺財食豐足見在日時益於財祿

凡太陽照命不過惡星自然受福積財不是主旺亦
吉

日同火土輕祿薄財又遇蝕神破離鄉土

如逢火土二星主衣食不厚多招歇滅損害父母亦
破祖財亦招刑厄損壽損身妻同子逆善不堅長身

無久遠又加羅計刑害太甚離破鄉土亦主傷殘人
多憎惡亦好邪淫多犯王法更逢交逆滅傷壽筭
淡薄初年艱難財祿日沒月藏富而多福

太陽臨照十二宮

命宮

守照命宮主面部嚴方顏色紅白陽宮為命入廟為
科名文章貴品清職修學聰明為人性快不藏事務
實不偽性敏精忠博通畏事敏而有斷不忍奸欺不

妄求不過貪見苦生念其財與祿成在中末之年福
祿兼全有災無虞及主壽筭長遠平生有福慶常得
貴人見知不受貧苦與火同對在財帛田宅宮主破
遇土星主父母有心腸疾卒暴顛酒與字同對在三
六九十二宮主尅父與木交會足祿多財在寅丑辰
三宮見木日大貴在申戌二宮見水日大富在酉宮
家藏金玉在戌宮田宅廣居在閑極自小無災

詩斷太陽臨命性融和 衣祿贏餘禍散磨

東出壽長西沒減 半生滯漉少年過

太陽在命九品遷 小人富貴足庄田

三合近強看紫炁 陷沒沉居事不全

太陽原是火之精 躔度偏宜金水星

晦朔孛羅同一處 太陽薄蝕命須傾

命在太陽孛羅守 太陽又怕逢張柳

婦人戲謔成姦淫 男子淫奔別鄉走

財帛宮

初年多破中末方吉主居貴位同木財最多此宮同
水主失脫○日照一生近貴人財帛主得福人財寶
成立

詩斷日居財帛要陽宮 晝生為福夜為凶

只憂計字來相尅 財帛猶閑壽不中

太陽來臨陽極宮 還應財物獲榮昌

日在長生多得地 定須豪貴越非常

兄弟宮

主招一二人吉得力富貴三合性快為官不過七品
為祿必定因同類進財日照主兄弟可保一二人之
力

詩斷兄弟有若鴈同行 豈使三宮陷太陽

雖是同胞如手足 分張各自富田庄

兄弟相邀出外鄉 只因第四犯刑傷

刑傷不用他宮取 男犯太陰女太陽

田宅宮

主得父母財物先破祖後自成招外田庄末年方可
旺盛

日照主高貴宅舍大招田宅產業

詩斷田宅之宮有太陽 須知此位最高強

膏腴萬頃連阡陌 榮祖榮宗福祿昌

日月合照來田宅 田宅定多誇阡陌

或逢紫炁與羅睺 一生長是漂流客

五男女宮

主招一子自身晚貴與金水同主招俊麗之男更入廟不同凶煞男女清貴○日照先見男吉

詩斷子孫宮內得陽宮 才藻文章竟出塵

金馬玉堂應有路 少年平步上青雲

太陽男少女又足 祿順行宮逢土木

更兼熒惑不相刑 子受官班見五六

太陽子位獨難當 損破頭男子受殃

若有吉星相扶救 二男異日貴非常

奴婢宮

主尅父奴婢不得力此星不凶終吉在白羊宮十分
力晚榮貴○日照主招鞍馬及有得力女使

詩斷奴婢之宮號陷方 照臨君父豈為良

縱饒父體常清健 亦恐當年壽早傷

奴僕雖非高強地 若是太陽亦為貴

其他紫炁及羅睺 自然不得分毫利

日曜加臨侍從宮 賢奴俊馬盛如龍

妻母被淫欺尅陷 破家偷盜反為凶

妻妾宮

主妻美貌有財性快清秀有吉宿同者娶貴家女財帛豐厚增壯門風身主大貴○日照貴相之妻及因妻

家發旺

詩斷太陽臨照在妻宮 位望尊嚴德貴崇

莫使忌星興悖逆 婚姻皇族富豪中

西沒之中逢日星 頭妻帶甲始安榮

半路分離難保守 更兼孕育不曾停

疾厄宮

主身近貴不近小人見水星主有刑破異相火同主
眼疾身破免疾○日照主身少疾患有壽不犯天災
詩斷疾厄宮中見陽星 身體康榮豈見迤

設使忌星多犯破 反傷眼目不光明

第八宮中見太陽 偏於酒色起災殃

父兄先陷妻先死 計孛同宮死外鄉

遷移宮

主內職出入近侍上貴人得人敬重益壽大旺多利
遠行○日照一生好遠遊常得他方道路之分

詩斷第九宮中遇太陽 更無凶曜在其傍

好將平日習中學 對策天庭謁帝王

官祿宮

主大貴居星宿定為一品官小人衣食一生少到官
府不加凶危大事成小○日照宜奉公若有官厄常

有恩赦之救

詩斷太陽得在十宮居 抱負宏才仰大儒

他日遺賢求呂傳 官高輔弼掌鈞樞

太陽金水同官祿 主將同行真有福

計都在巳字未鄉 橫貴功名仍納粟

福德宮

主為人洞達無私曲 一生好動晝生逢土夜生逢火
安閒有壽逢金水主福壽雙全○日照主身心勞漉

小人遇之奔走無寧日

詩斷福德宮中遇太陽 光明心事又康強

金水兩扶成輔弼 天然富貴永無雙

太陽喜臨福德地 只嫌朔望逢羅計

孛亦為災福不全 晝火夜土更須忌

相貌宮

主為人聰明少貴日生逢火麓醜髮黃夜生逢土項
短眉麓○日照主形相具足多破小人相輕不可與

下等人作事

詩斷相貌一宮名惡弱 吉星照處合虛着

惟怕羅睺月孛星 來與太陽相倚約

善星多向命宮排 相貌宮中君火來

又得星辰行順段 平生衣祿自相隨

太陽變段星

寶瓶宮日華星○又名天貴星主得貴人力也

詩斷太陽本是日華星 晝夜循環不暫停

若是日生多福祿 夜生終不免災迤

磨蝎宮浮梁星○又名天馬星主貴而不達

詩斷太陽年有三百六 催促光陰如迅速

晦朔惟忌計羅侵 夜生之人須減福

人馬宮扶桑星○又名天基星主得貴人成立

詩斷太陽始出拂扶桑 身命加臨近帝王

福祿官宮居極品 若臨五弱亦尋常

天蝎宮賜谷星○又名天烏星主橫得貴人財

詩斷卯酉亥黃二八門 日生暘谷最英靈

田宅官宮身命貴 六宮十二禍深行

天秤宮虞泉星○又名天輔星得大貴人托輔

詩斷日出龍門生角亢 天中曜影登虞泉

照臨宇宙施恩澤 首尾相逢福綿綿

雙女宮白陽星○又名天福星因貴人成福祿

詩斷己宮日是白陽烏 照曜乾坤總一如

無黨無偏君子志 何愁福祿不安居

獅子宮朱明星○又名天祿星得貴人提挈食祿

詩斷騰光離位號朱明 日出乾坤萬象清

此是太陽真廟旺 七強宮內保光亨

巨蟹宮曜靈星○又名天柱星因貴人委用成家

詩斷曜靈侵入太陰宮 錯亂陰陽理不同

性硬氣剛須怕婦 妻強夫弱挫英雄

陰陽宮東君星○又名天弼星主大貴人成立也

詩斷太陽五月至於申 位屬三陰一氣陽

此是東君為失位 七強宮得也為殃

金牛宮咸池星○又名天沒星因貴人成祿

詩斷太陽東出沒於西 喜逢吉曜會咸池

歲星若得來臨照 福壽榮華晚更宜

白羊宮大明星○又名天德星主貴人成家


詩斷太陽戌地日歸藏 入廟君臣佐玉堂

四正宮中并八煞 一生富貴壽延長

雙魚宮朝天星○又名天殘星因貴人損傷破敗

詩斷亥上朝天諸位拱
六陰之位來相并

玉璽為名象屬君
子孝臣忠福祿盛



星學大成卷十八